

Aitziber Agirre Ruiz de Arkaute
Elhuyar aldizkariaren zuzendaria



Euskal kazetaritzaren 10 mugarri

Rikardo Arregi Kazetaritza Sariak 30 urte bete dituzte aurten, eta zerbait oso berezia egin nahi izan dute antolatzaileek: euskal kazetaritzan mugarri izan diren 10 proiektu komunikatibo izendatu dituzte. Albiste ezin pozgarriagoa izan da guretzat *Elhuyar* aldizkaria izatea 10 mugarri horietako bat! Luxuzko bidelagunak izan ditugu, gainera: *Berria/Euskaldunon Egunkaria*, *Argia/Zeruko Argia*, EITB taldea, Goiena Komunikazio Taldea, EHUko Gizarte eta Komunikazio Zientzien Fakultatea, Euskal Irratiak, *Anaitasuna* aldizkaria, Eibar.org eta *Ttapi-Ttapa* aldizkaria.

Guretzat, ohorea izan da euskal kazetaritzaren festan parte hartzea. Eta, pozaren pozez, esker ona adierazteko premia datorkigu bihotzera. Eskerrik asko, duela 32 urte eta ausardiaz beteta, artean euskarazko zientzia-komunikazioa hasita ere ez zegoenean, *Elhuyar* aldizkaria sortu zenuteno. Nola ez, eskerrik asko harpidedun guztioi, zuen babesik gabe ezingo baikenuen urte hauetan guztietan ilusioz beterik iraun. Eta eskerrik asko hemengo zientzialariei ere, beti laguntzeko eta elkarlanean jarduteko prest egoteagatik. Iritzi kualifikatua behar dugunean, informazioa eskatzen dizuegunean, edota zuen ikerketen berri ematen diguzuenean... gertu sentitzen zaituztegu. Eskerrik asko, bihotzez. Sari hau zuena ere bada. ●